

23 JUL 2001

UEM-PENGAMBILALIHAN

DANASAHAM BAGI NOTIS PENGAMBILALIHAN KPD UEM

KUALA LUMPUR, 23 Julai (Bernama) -- Khazanah Nasional Bhd, cabang pelaburan kerajaan menawarkan untuk membeli baki saham dan waran United Engineers (Malaysia) Bhd (UEM) yang belum dimilikinya masing-masing pada harga RM4.50 sesaham dan 40 sen bagi satu waran secara tunai.

Khazanah sudahpun memiliki 1.773 juta saham biasa bernilai 50 sen setiap satu dalam UEM atau 0.22 peratus daripada modal terbitan dan berbayar UEM dan 1,151,600 waran mewakili kira-kira 1.16 peratus daripada waran UEM.

Menerusi anak syarikat milik sepenuhnya Syarikat Danasaham Sdn Bhd, jentera pelaburan khas, Khazanah Nasional hari ini memberi notis tawaran sukarela bersyarat kepada lembaga pengarah UEM.

Mengumumkan perkara ini sebagai mewakili Danasaham, Aseambankers Malaysia Bhd menyatakan syarikat itu telah menawarkan untuk mengambilalih baki 815,303,483 saham bernilai 50 sen setiap satu, mewakili kira-kira 99.78 peratus daripada modal terbitan dan berbayar penuh UEM sehingga 19 April, 2001.

Danasaham juga menawarkan untuk mengambilalih 98,053,203 waran mewakili 98.84 peratus daripada waran dalam UEM dan semua saham biasa baru bernilai 50 sen setiap satu dalam UEM yang mungkin diterbitkan selaras dengan pelaksanaan tawaran waran dalam UEM.

Aseambankers berkata Danasaham mahu menggugurkan UEM dari penyenaian Bursa Saham Kuala Lumpur (BSKL) sejajar dengan penyelesaian tawaran sukarela itu.

Bagi mengeluarkan UEM dari penyenaian, Khazanah memerlukan sekurang-kurangnya 90 peratus pegangan dalam syarikat tersebut.

Penganalisis percaya Khazanah tidak berdepan dengan banyak masalah untuk memenuhi had siling ini di mana Renong mempunyai pegangan 37.92 peratus dan Kumpulan Wang Simpanan Pekerja (KWSP) dikatakan bersedia menerima tawaran itu.

KWSP dan agensi berkaitan kerajaan lain dijangka memiliki 13 peratus pegangan UEM.

Seorang penganalisis berkata dengan Danasaham bertegas ia tidak akan menyemak semula tawaran tersebut, pelabur-pelabur tidak mempunyai pilihan lain selain menerima harga RM4.50 itu.

"Kerajaan mempunyai dana terhad dan menunjukkan bahawa tawaran itu adalah sama ada jika mahu ambil, jika tidak biarkan sahaja," katanya.

"Ketika pasaran menjangkakan harga tawaran RM6, pelabur-pelabur kini perlu berusaha keras untuk menangani kerugian mereka," katanya.

Sementara itu seorang pengurus dana berkata tawaran itu telah menimbulkan banyak persoalan berhubung kumpulan UEM-Renong.

Ia termasuklah sama ada kerajaan akan meneruskan kewajipan opsyen jualan Halim Saad, bila kerajaan akan mengambilalih Renong dan malahan sama ada kerajaan akan mengambilalih kumpulan korporat lain yang berdepan dengan masalah.

Terlalu banyak persoalan yang tidak terjawab dan butir-butir terperinci berhubung tawaran itu tidak mencukupi, katanya.

Sementara itu, Khazanah akan mengadakan sidang media tengah hari ini untuk memberi taklimat ringkas tentang langkah terbaru itu.

Halim, bekas naib pengerusi eksekutif UEM pada 1998 membuat opsyen jualan RM3.2 bilion untuk membeli 32 peratus modal berbayar Renong daripada UEM.

Halim, pemegang saham utama Renong hanya membayar RM100 juta sebagai bayaran ansuran pertama opsyen jualan itu.

Renong, yang menanggung hutang bernilai RM13 bilion mempunyai kepentingan dalam pembinaan, lebuhraya, hotel, perbankan dan pembangunan hartanah.

"Jika Khazanah meminta Halim menunaikan opsyen itu, pasaran tidak akan mengganggu pengambilalihan UEM itu sebagai satu usaha menyelamatkan.

"Selagi pasaran melihat kerajaan terikat kepada tadbir urus korporat dalam niaga janji itu, sepatutnya ia tidak menjadi satu masalah," kata seorang peniaga.

Beliau juga berkata pengambilalihan UEM mungkin satu tindakan pendahuluan kepada pengambilalihan Renong oleh kerajaan seperti yang dibayangkan oleh Perdana Menteri Datuk Seri Dr Mahathir Mohamad pada minggu lalu.

"Kami agak terkejut kerajaan mengambilalih UEM terlebih dahulu dan bukan Renong. Mungkin masalah Renong terlalu rumit, mungkin kerajaan melakukannya secara berperingkat," katanya.

Saham UEM dan Renong digantung sejak 18 Julai lalu sementara menunggu pengumuman pengambilalihan itu dan kali terakhir disebut harga masing-masing pada RM3.56 dan 80.5 sen. -- BERNAMA

MAD MOT SD ZK